

1001 MASALAH

ABU AL-MUKHTAR SEDIA MENJAWAB



Pertanyaan daripada:

Wan Hasiah binti Wan Mamat,
Balai Polis Cerang Duku,
Semarak – Pasir Putih,
Kelantan.

1. Di bumi manakah Nabi ‘Isā dilahirkan dan apa nama bumi itu sekarang?

2. Bagaimana puncanya Nabi ‘Isā dipalang (disalib). Adakah benar Nabi ‘Isā yang dipalang atau pun orang lain yang diserupakan oleh Allah semacam Nabi ‘Isā. Kalau bukan Nabi ‘Isā yang dipalang itu adakah ia wafat atau ghaib atau bagaimana?

Perhatian

Saudari Wan Hasiah!

Saudari telah mengirim kepada kami sebanyak 7 soalan. Oleh kerana ruangan “1001 Masalah” ini terbatas, maka buat kali pertamanya kami hanya dapat menjawab dua soalan sahaja seperti di atas. Soalan-soalan yang bakinya akan kami jawab pada masa lain. Hanya soalan-soalan mengenai asal puncanya huruf-huruf “ا, ب, ت,” dan “A, B, C” tidak akan kami jawab, lantaran kedua-dua pertanyaan tersebut tidak ada kena mengena dengan masalah agama. Ini adalah di antara syarat-syarat pertanyaan kepada ruangan “1001 Masalah” sebagaimana telah kami terangkan dalam majalah QALAM bilangan (218).

Jawapan

1. Nabi ‘Isā ‘alayhi al-salām dilahirkan di Baitul Maqdis yang terletak di bumi Palestin di suatu tempat bernama “Baitul Lahām”. Sekarang tempat Nabi ‘Isā dilahirkan itu telah dibangunkan sebuah gereja Kristian dan dijadikan suatu tempat suci dalam sejarah agama Kristian. Bumi Palestin itu hingga sekarang masih tetap dinamakan “Palestine” juga hanya Baitul Maqdis orang-orang Barat menamakannya “Jerusalem”.

2. Berhubung dengan cerita atau kisah puncanya Nabi ‘Isā dipalang (disalib) itu, kisah yang sebenarnya ada diterangkan oleh Tuhan di dalam beberapa ayat di dalam al-Qur'an al-Karim; di antaranya Allah berfirman dalam Sūrah al-Nisā' ayat (157-158):

*“Wa qawlihim innā qatalnā al-masīḥ
‘Isā ibnā Maryam rasūl Allāh, wa mā
qatalūhu wa mā ṣalabūhu wa lākin shubbiha lahum,
wa inna alladhīnā ikhtalafū fīhi lafī shakki
minhu mā lahum bihi min ‘ilmī, illā ittibā‘a
al-zanni wa mā qatalūhu yaqīnā. Bal rafā‘ahu Allāhu
ilayhi wa kāna Allāhu ‘azīzā hākīmā.”*

Maksudnya: “Oleh kerana perkataan mereka (orang-orang Banī Israel Yahudi) yang mengatakan: ‘Sesungguhnya kami telah membunuh al-Masīḥ ‘Isā anak Maryam seorang yang dikatakan Rasulullah.’ Yang sebenarnya mereka tidak membunuhnya

(Isa) dan tidak pula mereka mensalibnya (memalangnya), tetapi (yang mereka bunuh itu), ialah seorang (lain) yang diserupakan dengan ‘Isā bagi mereka. Sesungguhnya orang-orang yang berselisih faham tentang (pembunuhan) ‘Isā, sebenarnya mereka dalam keraguan. Mereka tidak mempunyai keyakinan siapa orang yang telah mereka bunuh itu, hanya mengikut sangkaan sahaja, dan mereka tidak (pula) yakin bahawa yang mereka bunuh itu ialah ‘Isā tetapi (yang sebenarnya) Allah telah mengangkat ‘Isā kepada-Nya, dan adalah Allah Maha Kuasa lagi Maha Bijaksana.”

Untuk menerangkan tujuan ayat-ayat di atas dengan lebih jelas, maka kami akan membawakan beberapa pendapat ulama tafsir yang kami petik dari tiga buah kitab tafsir yang telah diterjemahkan ke dalam Bahasa Indonesia:

Pendapat Pertama:

Orang-orang Yahudi mengatakan bahawa mereka telah membunuh Nabi ‘Isā, tetapi yang sebenarnya tiadalah mereka itu membunuh dan menaikkannya di kayu palang (salib), melainkan yang mereka salib itu ialah salah seorang murid Nabi ‘Isā yang berkhianat, namanya “Yahuza” yang kelihatan (bentuk mukanya) serupa dengan Nabi ‘Isā sewaktu tentera datang menangkapnya. Tetapi mereka masih ragu-ragu dan tidak mempunyai pengetahuan (keyakinan) yang pasti tentang kematian Nabi ‘Isā itu.

Di dalam kitab Injil diterangkan bahawa Nabi Isa disalibkan hanya beberapa jam sahaja, kemudia ia diturunkan dan dibawa oleh seorang yang bernama

1001 Masalah

Yusuf (Juseph) dan lantas diletakkanya dalam sebuah tempat merupakan kubur yang lapang dan di atasnya ditutup dengan batu – *Luqā* (Lucas: 23-53), kemudian ia bangun kembali dan berangkat menuju ke Galilea, sebab itu mereka ragu-ragu tentang kematian Nabi ‘Isā, kerana tidak mungkin dalam masa beberapa jam sahaja ‘Isā akan mati. Dan Pilatus sendiri pun hairan mendengar ‘Isā diberitakan sudah mati. (Markus: 51-44).

Tuhan mengangkat Nabi ‘Isā kepada-Nya, bererti meninggikan darjah dan kemuliannya secara yang dikehendaki Allah. (lihat tafsir Qurān, oleh: H. Zainuddin Hamidi Fakhruddin H. S. – muka surat: 142).

Pendapat Kedua:

Mereka yang kafir itu mengatakan: “Kami telah membunuh ‘Isā anak Maryam dan mensalibnya,” Tetapi sebenarnya mereka tidak membunuhnya dan tiada pula mensalibnya, melainkan orang lain yang serupa mukanya dengan ‘Isā itu, ialah Yahuza. Sebenarnya serdadu (tentera) yang menangkap Isa itu tidak tahu benar akan ‘Isā. Sebab itu ditangkapnya Yahuza yang serupa dengan dia. Hal ini banyak kejadian dalam cerita-cerita purbakala, iaitu bahawa seseorang yang tiada bersalah disuruh bunuh oleh raja, tetapi orang lain yang terbunuh. Tatkala serdadu itu menangkap Yahuza, larilah ia melenyapkan dirinya ke tempat yang tiada mereka ketahui.

Maka ertinya Allah mengangkat ‘Isā

kepada-Nya, iaitu mengangkatnya kepada tempat kemuliaan-Nya atau ke tempat yang disukai-Nya (bukan atas langit, kerana Tuhan itu bukan di atas langit, ia tidak bertempat). Hal ini sama dengan keadaanya dengan firman Allah di dalam Sūrah al-Ṣaffāt ayat (99) Juzuk (23) tentang meriwayatkan perkataan Nabi Ibrāhīm: “Saya pergi kepada Tuhan saya”. ERTINYA kepada tempat yang disukai Tuhan saya, iaitu negeri Syam.

Orang-orang Nasrani mengatakan bahawa Nabi ‘Isā lah yang disalib oleh orang-orang kafir, gunanya untuk menebus dosa sekalian anak Adam yang telah berbuat dosa dari semenjak dahulu kala. Dengan pendek mereka mengatakan bahawa Nabi ‘Isā itu diseksa dan disalib untuk mengampuni dosa sekalian orang-orang yang berdosa di atas dunia ini.

Kepercayaan yang seperti ini tidak dapat diterima oleh akal yang waras, keana menurut undang-undang Allah yang adil, bahkan juga undang-undang yang diperbuat oleh manusia, bahawa siapa yang bersalah dan berdosa, dialah yang akan diseksa, bukannya orang lain yang tidak memperbuat kesalahan sedikit jua.

Di atas tadi ada diterangkan bahawa ertinya Allah mengangkat Nabi Isa kepada-Nya, ialah mengangkatnya kepada tempat kemuliaan-Nya atau ke tempat yang disukai-Nya. Keterangan ini ialah menurut yang kita ambil dari tafsir Muhammad Abduh – seorang ahli tafsir yang kenamaan di negeri Mesir.

Tetapi kebanyakkan ahli tafsir berkata: Bahawa ertinya ialah Allah mengangkat Nabi ‘Isā ke atas langit dengan

tubuh dan rohnya. Sebenarnya keterangan ini bukanlah mereka ambil dari ayat yang tersebut, kerana dalam ayat itu cuma disebut: “Allah mengangkat ‘Isā kepada-Nya,” bukan diangkat ke atas langit, sedang Allah itu bukan di atas langit; melainkan mereka mengambil keterangan itu dari hadith-hadith Nabi Muhammad (S.A.W) yang menerangkan bahawa Nabi ‘Isā (pada akhir zaman nanti) akan turun, memang (jika diambil makna zahir) turun itu tentulah dari tempat yang tinggi iaitu langit. (Lihat tafsir Muhammad Yunus, muka surat: 86 dan 100).

Pendapat Ketiga:

Allah telah menurunkan laknat ke atas kaum Banī Israel (Yahudi), lantaran mereka kufur kepada agama Allah dan lantaran mereka menuduh Siti Maryam berzina dan juga lantaran perkataan mereka: “Bahawa kami telah membunuh ‘Isā anak Maryam yang dikatakan Rasul Allah”, pada hal mereka tidak dapat membunuh dan tidak dapat mensalibnya, tetapi Allah samarkan ke atas mereka, hingga mereka salib seorang lain; dan orang-orang yang berselisihan faham tentang hal terbunuhnya Nabi ‘Isā dan tersalibnya itu, tidak lain melainkan dengan sangka-sangkanya sahaja, dan mereka tidak membunuhnya dengan yakin, tetapi Allah telah mengangkat dia ke hadrat-Nya, kerana Allah itu Gagah lagi Bijaksana. (lihat *al-Furqān fi Tafsīr al-Qur’ān* oleh A. Hasan muka surat; 191).

Ulasan Kita:

Inilah tiga pendapat yang kita petik dari 3 buah kitab tafsir yang dikarang dan disusun oleh tiga

1001 Masalah

orang ulama tafsir Indonesia.

Walau bagaimanapun ketiga pendapat ini, tetap menafikan bahawa Nabi ‘Isā itu benar-benar dibunuh dan disalib oleh Banī Israel (Yahudi), tetapi yang sebenarnya, ia telah diangkat oleh Tuhan kepada-Nya. Tempat Nabi ‘Isā diangkat itu tidak pula diterangkan oleh ayat 157 dari Sūrah al-Nisā’ itu. Jumlah kata: “Ia telah diangkat oleh Tuhan kepada-Nya” itu sudah jelas menafikan bahawa Nabi ‘Isā itu telah diangkat oleh Tuhan kepada-Nya di langit, lantaran Tuhan itu tidak bertempat di langit; Tuhan tidak mempunyai tempat yang tertentu,

begitulah menurut keterangan dalam ilmu tauhid. Sebagai mentafsirkan erti ayat yang mengatakan: “Nabi ‘Isā telah diangkat Tuhan kepada-Nya”, maka kebanyakan dari ulama tafsir berpendapat bahawa Nabi ‘Isā itu telah diangkat untuk memperlindunginya, hanya Allah sahajalah yang mengetahuinya.

Tetapi walau bagaimanapun sekawtu ia diangkat Tuhan itu Nabi ‘Isā tidak mati, malahan ia masih hidup dengan nyawa dan jasad seperti manusia biasa, ini dapat kita yakini dari keterangan beberapa hadith Nabi Muḥammad (SAW) yang mengatakan bahawa Nabi ‘Isā akan turun pada akhir zaman membawa syariat Nabi Muḥammad menentang dajjal-dajjal yang akan menggoda

orang-orang Islam masuk ke perangkapnya untuk menyesatkan mereka dari mempercayai agama Islam. Sebagai orang Islam pendapat ini wajiblah kita percayai dengan penuh keyakinan agar supaya kita tidak pula termasuk dalam golongan orang-orang kafir (Nasrani dan Yahudi) yang mengatakan bahawa Nabi ‘Isā itu benar-benar telah mereka bunuh dan disalib.

Hanya sekianlah jawapan yang dapat kami berikan atas dua pertanyaan yang telah dikemukakan oleh saudari Wan Hasiah, dengan harapan semoga beliau akan berpuas dengan jawapan kami yang seringkas ini.

- Abu al-Mukhtar.

Sudah Terbit

Cetakan Baru!

Sembahyang Rasulullah (Oleh al-Ustaz Abu Bakar Ashaari)

Sebuah buku pedoman mengerjakan ibadah sembahyang mengikut cara-cara sembahyang yang telah dilakukan oleh

Rasulullah *ṣallā Allāhu 'alayhi wa sallam* bersabda kepada hadith baginda yang berbunyi:

Sallū kamā ra'aytumūnī usallī. Ertinya “Sembahyanglah kamu sebagaimana kamu lihat aku sembahyang”

Pesanlah kepada:

Sebuah \$3.00

QALAM

Belanja *post* 20 sen.

8247 Jalan 225

Petaling Jaya Selangor.